

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA
GRADSKO VIJEĆE**

PRIJEDLOG

PREDLAGAČ:
*Ocjenjivački sud za javna
priznanja Zenice*

**ODLUKA
O DODJELI JAVNIH PRIZNANJA ZENICE
POVODOM 20. MARTA - DANA GRADA ZENICA**

Zenica, februar 2023. godine

**BOSNA I HERCEGOVINA
FEDERACIJA BOSNE I HERCEGOVINE
ZENIČKO-DOBOJSKI KANTON
GRAD ZENICA
GRADSKO VIJEĆE**

Na osnovu člana 21. tačka 14) Statuta Grada Zenica („Službene novine Grada Zenica“, broj: 5/15) i člana 25. Odluke o javnim priznanjima Zenice ("Službene novine općine Zenica", broj: 10/01- prečišćen tekst), na prijedlog Ocjenjivačkog suda za javna priznanja Zenice, Gradsko vijeće Zenica, na ____sjednici održanoj _____ 2023. godine, donosi

**O D L U K U
O DODJELI JAVNIH PRIZNANJA ZENICE POVODOM
20. MARTA - DANA GRADA ZENICA**

I

GRB GRADA ZENICE dodjeljuje se:

1. Fuadu Kasumoviću, Gradonačelniku Grada Zenica
2. prof.dr. Mahmutu Karaliću, posthumno

II

NAGRADA ZENICE dodjeljuje se:

1. dr. Ibrahimu Ceri

Novčani iznos javnog priznanja "**NAGRADA ZENICE**" utvrđuje se u visini od **2.500,00 KM.**

III

"PLAKETA ZENICE" dodjeljuje se:

1. UG „Naš most“
2. Husniji Arapoviću, posthumno

IV

Javna priznanja iz ove odluke uručit će se na svečanoj sjednici Gradskog vijeća Zenica.

V

Ova odluka stupa na snagu danom donošenja iste i ima se objaviti u "Službenim novinama Grada Zenica".

Broj: 01- / 23
Zenica, _____ 2023. godine

**PREDSJEDAVAJUĆI
GRADSKOG VIJEĆA ZENICA**

Mirza Husetić

OBRAZLOŽENJE

KANDIDATI ZA GRB GRADA ZENICE

1. Fuad Kasumović, Gradonačelnik Grada Zenica

Fuad Kasumović rođen je 1958. godine u Gornjem Vakufu. Živi u Zenici sa suprugom Mersijom i kćerkom Aidom. Nakon završenog Ekonomskog fakulteta 1987. godine, zapošljava se u Rudniku uglja „Gračanica“ u rodnom gradu, a ubrzo postaje i finansijski direktor ovog preduzeća gdje radi do početka rata 1992. godine. Bio je pripadnik Armije RBiH i nosilac je najvećeg priznanja “Zlatni ljiljan”. Po završetku rata dobija posao u Ministarstvu namjenske proizvodnje u Vladi Republike BiH. Političku karijeru počinje 1996. godine kao ministar finansija u Srednjobosanskom kantonu. Prije isteka mandata, u julu 1998. godine, imenovan je za zamjenika direktora Carinske uprave Federacije Bosne i Hercegovine. Od 2001. godine, pa tokom dvije naredne godine, obavlja funkciju savjetnika za finansije u Carinskoj upravi da bi, nakon uspostave Uprave za indirektno oporezivanje (UIO) 2004. godine, bio imenovan za savjetnika direktora za međunarodnu saradnju. Osnivač je stranke Nezavisni blok. Početkom 2022. godine osnovao je novu stranku "Bosanskohercegovačka inicijativa - Kasumović Fuad", te je izabran za njenog predsjednika.

Gradonačelnik grada Zenice gospodin Fuad Kasumović na čelu grada Zenice stoji već punih šest godina. Za taj period uspio je stabilizirati gradski budžet, koji je dobio razvojnu komponentu. Uz podršku međunarodnih faktora osigurao je 18,5 miliona eura grant sredstava za realizaciju projekta zbrinjavanja otpadnih voda. Bez ikakvog dodatnog zaduženja grada Zenice riješio je generacijski projekt Toplane Zenica vrijedan 100 miliona KM. Zahvaljujući zalaganju Gradonačelnika Fuada Kasumovića Zenica je prvi grad u BiH koji je uvršten u projekt Zeleni gradovi. Potrudio se da grad Zenica postane 11. lokalna zajednica u Federaciji BiH, koja je dobila BFC certifikat, kao destinacija s povoljnim poslovnim okruženjem. Pokrenuo je i osnivanje dvije poslovne zone koje obećavaju dalje ekonomsko jačanje grada Zenica. Kao Gradonačelnik je svojim stvaralačkim uzorom pokrenuo visok stepen odgovornosti za realizaciju kapitalnih projekata. Tako je počeo i realizaciju projekata izgradnje i rekonstrukcije infrastrukture i puteva u ruralnim dijelovima grada, koji su bili na čekanju nekoliko decenija. Zahvaljujući zalaganju Gradonačelnika gosp. Fuada Kasumovića na cijelom području grada Zenica

kontinuirano se radi na rješavanju i unapređenju komunalnih usluga kroz različite projekte, s ciljem unapređenja uslova za kvalitetniji život građana, poput javne rasvjete, vodosnabdijevanja, odvoza otpada, uspostave zajedničkih komunalnih naplatnih mjesta na inicijativu građana Zenice itd. Zenica je, na osnovu svega, na godišnjem nivou uštedjela velika finansijska sredstva. Gradonačelnik je riješio i glavne probleme u sportskim kolektivima i založio se za oživljavanje i afirmaciju sporta i kulture u gradu Zenica. Svojim političkim uticajem osigurao je da Vlada F BiH izdvoji finansijska sredstva za izgradnju zatvorenog bazena i nove zgrade hitne pomoći s pratećim sadržajima u gradu Zenica. Zaslužan je za oživljavanje kulturnih događaja u gradu Zenica kao što su Zenica Summer fest i Zenica Adventure. Pored navedenog, kontinuirano pomaže i podstiče poljoprivredu. Pomaže i podržava penzionere grada Zenica. Unaprijedio je uslove života u gotovo svim mjesnim zajednicama. Daje nesebičnu podršku svim udruženjima i aktivistima grada Zenica. Promijenio je identitet centra Zenice, realizujući brojne projekte poput urbanog zelenog toka, uređenja gradskih ulica, utopljanja zgrada itd. itd.

2. prof.dr. Mahmut Karalić, posthumno

Mahmut Karalić rođen je 1950. godine u mjestu Radinovići kod Zenice. Osnovnu školu pohađao je u svom rodnom mjestu, nakon čega se upisuje u Gazi Husrev-begovu medresu u Sarajevu. Poslije odsluženja vojnog roka, tri godine radi kao imam. 1974. godine odlazi u Saudijsku Arabiju gdje na Islamskom Univerzitetu u Medini, nakon učenja arapskog jezika, upisuje Fakultet hadisa i hadiskih znanosti, na kome uspješno i u roku diplomira u prvoj generaciji ovog fakulteta 1980. godine. Od 1980. do 1985. godine radi kao vjersko-prosvjetni referent u Odboru Islamske zajednice u Sarajevu i ujedno vanredno predaje hadis u Gazi Husrev-begovoj medresi. Od 1985. do 1992. godine, kao redovni profesor, predaje hadis, tefsir i imamet u Gazi Husrev-begovoj medresi u Sarajevu. Učestvovao je u odbrambeno-oslobodilačkom ratu 1992-1995. i dobitnik je ratnog priznanja „Zlatni ljiljan“. Proveo je devetnaest godina prevodeći sa arapskog na bosanski jezik djelo “El-Kutubu-s-sitteh”, odnosno šest hadiskih zbirki koje svezupno sadrže 32.401 hadis. 2018. godine dobio je nagradu “Sheikh Hamad” za prevod i međunarodno razumijevanje, koju dodjeljuje država Katar. Dobitnik je Plakete Zeničko-dobojskog kantona za izuzetan doprinos promociji Zeničko-dobojskog kantona u oblasti nauke. Preminuo je dana 11.01.2021. godine u Zenici u 71. godini života.

KANDIDAT ZA NAGRADU GRADA ZENICE

1. dr. Ibrahim Cero

Prim. dr. Ibrahim Cero rođen je u Gornjem Vakufu 1957. godine. Osnovno obrazovanje stiče u Vitezu. Gimnaziju završava u Travniku, a Medicinski fakultet u Sarajevu 1980. godine.

Nakon okončanja studija počinje ljekarska karijera dr. Cere u Domu zdravlja Zenica.

1984. godine započinje specijalizaciju iz Opšte hirurgije koju okončava 1988. godine u Sarajevu.

Često dr. Cero s ponosom i zahvalnošću zna reći da je humanost, ljekarsku etiku i hiruršku vještinu učio od bardova zeničke i bh. hirurgije: dr. Asima Delibašića, dr. Zlatana Ćurića, dr. Voje Milosevića, dr. Danila Okiljevića, dr. Alije Smajlovića, dr. Adema Hadžića, dr. Ferida Fetahagića, dr. Boška Kukolja i dr. Sahiba Muminagića, te da je u pristupu mlađim generacijama i sam uvijek nastojao raditi i činiti onako kako su ga učile njegove starije cijenjene kolege. Bez skromnosti valja ustvrditi da je dr. Cero zavjetovan tom cilju, to i postizao.

Uoči i početkom agresije na BiH, učestvuje u organizaciji i radu ratnih bolnica u Visokom, Zavidovićima, Gornjem Vakufu, Bugojnu, a kasnije i na Nisićkom ratištu i u Mostaru. Tu se posebno izdvaja odlazak putem spasa preko Grepka hirurške ekipe iz zeničke bolnice u opkoljeno Goražde u septembru 1992., a za što je nagrađen priznanjem i zahvalnicom organizatora otpora u Goraždu.

Ratna 1993. ga vodi u ratnu bolnicu u Suhodolu na Igmansko-Hadžićko ratište.

Krajem 1993. godine postavljen je za načelnika Službe za hirurške bolesti u matičnoj bolnici Zenica.

Pred kraj rata dr. Senail Sivo započinje procedure iz laparoskopije na Internom odjelu zeničke bolnice. Prelaskom laparoskopske opreme na Službu za hirurške bolesti, dr. Cero s kolegama počinje da razvija laparoskopsku hirurgiju u zeničkoj bolnici. Taj rad se posebno intenzivira po njegovom povratku iz SAD-a 1997. godine kad s kolegama dr. Granovom i rahmetli prof. dr. Mešićem provodi edukaciju iz laparoskopske hirurgije.

Svoje hirurško znanje širi boraveći na klinikama u Ljubljani, Rimu, Beogradu, Veroni, Hamburgu, Berlinu, Tokiju, Cirihi, Zagrebu, Pragu, te mnogim drugim, što je rezultiralo njegovim članstvom u Evropskoj asocijaciji endoskopskih hirurga.

Osim razvoja laparoskopske hirurgije, on sa saradnicima razvija i Odjel za vaskularnu hirurgiju kao i zaseban odjel za hirurgiju dojke. Pored ovih aktivnosti, aktivno se angažuje u organizaciji i uspostavljanju Udruženja hirurga Federacije BiH, a za što mu je dodijeljena povelja Udruženja.

31.12.2021. godine sa sticanjem zakonskih pretpostavki za mirovinu, nakon proteka preko 40 godina radne aktivnosti u humanoj misiji liječnika, kao i nakon desetina hiljada pruženih usluga građanima BiH, dr. Cero tek privremeno i administrativno odlazi u penziju.

Za svoj humani rad dr. Ceru proglašavaju i počasnim građaninom općine Vitez.

Božijom voljom, odlazak u mirovinu nije istovremeno i kraj humanog ljekarskog pregnuća dr. Cere. U dobrom zdravlju i stručnoj kreposti, s mlađim kolegama hirurzima i dalje nastavlja svoj rad, pa je na usluzi ljudima kojima on može biti od pomoći.

Dr. Cero će reći da mu je najveće priznanje topla riječ i pogled njegovih pacijenata koje susreće u svakodnevnom životu, a da posebnu zahvalnost za svoje uspjehe ima uputiti porodici koja je našla razumijevanja za njegovu posvećenost profesiji doktora u službi bolesnom čovjeku.

KANDIDATI ZA PLAKETU GRADA ZENICE

1. UDRUŽENJE GRAĐANA „Naš Most“ Zenica

Osnovano 1994. godine s ciljem da kroz umjetnost i kulturu promiče socijalnu inkluziju ranjivih grupa, fokusirajući se na starije osobe, žene i osobe s invaliditetom. U sklopu svoje galerije već godinama okuplja i radi s osobama treće životne dobi i za njih organizuje besplatne umjetničke radionice, kolonije i izložbe. Svjetska zdravstvena organizacija uključila je ovo udruženje u globalnu bazu inicijativa dobre prakse koje osnažuju starije osobe i afirmišu zdravo starenje.

U toku 2019. godine, udruženje je uspostavilo saradnju s četiri zemlje s dva kontinenta u oblasti kulture i umjetnosti: Sultanat Oman, Turska, Italija i Ukrajina i u fokusu svih ovih projekata je bilo društveno uključivanje starijih osoba.

2. Husnija Arapović, posthumno

Husnija Arapović je rođen 1944. godine u Zenici, a dugi niz godina radio je kao profesionalni nogometni menadžer sa UEFA PRO licencom.

Kao nogometaš-centarfor, osim u Čeliku, igrao je u banjalučkom Borcu, švicarskim St. Gallenu i Winterthuru, dok je bio na trenerskim klupama Schaffhausena (Švicarska), te Rudara, Čelika (u dva navrata), Veleža, Sarajeva, Rudara iz Zenice, Travnika i Viteza.

Bio je selektor mediteranske i A2 reprezentacije Bosne i Hercegovine u periodu od 1997. do 2002. godine.

Premинуo je dana 25.10.2022. godine u Zenici u 78. godini života.

OCJENJIVAČKI SUD

ZA JAVNA PRIZNANJA GRADA ZENICA